

國

朝

列

卿

紀

國朝列卿紀卷之十四

詹事府敘

夫詹事秦官也漢因之掌皇后太子家漢時太子門大夫庶子洗馬舍人皆屬二傳其太子家令丞率更僕中盾衛率等並屬詹事後漢省詹事而太子官悉屬少傅魏復置詹事晉不置自咸寧大安以來又置歷宋齊梁並總宮朝隋開皇初置詹事二年罷之至唐復置詹事府詹事一人掌內外衆務糾彈非違總判府事又置少詹事一人以貳之歷宋而下並因之我朝初建大本堂延名儒以教儲官與藩王此東宮輔導之始也洪武元年乃設輔導官屬有同知詹事院事副詹事左右詹

事詹事丞左右率府使副使同知左右率府事諭德贊善文學
中舍正字侍正洗馬庶子等官皆以勲舊大臣兼之不別設府
僚又改贊善爲贊善大夫設贊讀三年十二月禮部尚書陶凱
請選人專任 儲宮官屬罷兼領之職庶於輔導有所責成於
是 諭以父子一體君臣一心之意遂止十年置通事司設司
令司丞十四年三月丁未設左右司直郎十五年置左右二春
坊設大學士又設司經局設洗馬校書正字二十二年以各衙
門無管攝置詹事院以統屬之二十五年七月丁未改院爲府
定設詹事一人正三品少詹事二人正四品府丞二人正六品
首領官主簿一人七品錄事三人正九品二十九年十一月壬

戊增設屬官清紀司諫通事舍人二人從九品改錄事亦爲從九品其堂上官與翰林院官互兼職事而凡講讀纂修考試等官皆與本院同坊局雖各有印然事則詹事統之自永樂十九年定鼎北京以後南京詹事府不設官止設主簿一員然詹之爲言省也給也省給太子之家詹事之職於內外衆務無所不掌少詹事則貳之丞則掌文書以贊之通事舍人掌通謁賓贊禁令之事主簿掌勾稽錄事傳遞其詹事輔導自聖祖首取廷臣勲德老成者兼其職且諭老成人動有典則舉用賢才立國之本崇德尚齒尊賢之道輔導得賢人各盡職故連抱之本必以授大匠萬金之璧不以付拙工益見聖謨宏遠昭如

日月使任是職者有愧名德不有負於此官矣乎今詳各官年表於後其行實見於事紀其勲德茂著者表爲列傳

國朝列卿紀卷之十四

國初詹事府詹事年表

李善長

直隸定遠人功臣洪武元年以左丞相兼詹事封韓國公四年致仕

唐鐸

直隸鳳陽人功臣洪武二十二年以兵部尚書兼任尋致仕二十五年起詹事加太子少保三十二年卒

蹇義

四川巴縣人進士未樂二年以吏部尚書兼任二十二年加少師卒贈太師謚忠定

金忠

浙江鄞縣人儒士未樂二年以兵部尚書兼任十三年卒贈少師謚忠襄

國初詹事府詹事行實

李善長直隸鳳陽府定遠縣人元末兵起從太祖渡江平定天下歷中書左丞相宣國公兼太子少師洪武元年御史中丞劉基學士陶安言於上曰適聞中書及都督府議倣元舊制中書令欲奏以太子爲之上曰取法於古必擇其善者從之元氏胡人事不師古設官不以任賢豈可取法以太子爲中書令乎乃命詹同取東宮官制觀之曰朕今立東宮官取廷臣勲德老成者兼其職老成舊人動有典則夫舉用賢才立國之本崇德尚齒尊賢之道輔導得賢人各盡職故連抱之木必以授大匠萬金之璧不以付拙工於是善長兼詹事仍諭以兼

官之意及輔成之道二月善長率禮官進郊社宗廟議曰圜丘
曰方丘曰宗廟曰社稷各具沿革以進時大將軍徐達方伐中
原上復遣都督康茂才率兵叅同進取命善長祭告江河漢
濟之神五月上幸汴梁議定都兼謀取元都善長留守京師
一軍國重事皆決焉八月車駕還京師善長奏定吏戶禮兵刑
工六部官制部設尚書侍郎郎中員外主事各有定品以分理
庶務至爲要職十二月定官民喪服之制定三司朝賀東宮
儀二年正月承制命有司立功臣廟於雞籠山定太歲風雲
雷雨嶽鎮海瀆山川城隍諸神祭禮定翰林院官制二月丙寅
詔修元史命善長爲監修乙亥奉詔立皇陵碑四月奉

詔編祖訓錄定封建諸王國邑及官屬之制八月定大祀受誓戒
十二月議賞平定中原及守禦有功諸將三年正月議出師征
沙漠三月議定朝臣服色悉准所授散官四月定官民書札儀
式禁革民間名字有犯先聖先賢大國君臣并漢晉唐宋國號
等字者議置司農司開治所於河南司設卿一員少卿二員丞
四員主簿錄事各二員從之五月承制給存恤之祿以養國
初所設都先鋒十大元帥都尉指揮陣亡物故無子孫承襲者
之父母及妻無俾失所六月奏禁淫祀凡民庶祭先祖歲除祀
竈鄉村春秋祈土穀之神凡有災患禱於先祖若鄉厲邑厲之
祭則里社郡縣自舉之其僧道建齋設醮不許奏章上表投拜

青詞亦不許塑天地神祇及白蓮社明尊教白雲巫覡扶鸞降
聖書符咒水諸術並加禁止庶幾左道不興民無惑志 詔從
之議定文武官朝服之制七月元史成賜文綺及帛是秋善長
病上召汪廣洋爲右丞相時左丞楊憲恃寵專恣不法因挾
私劾廣洋陰事善長怒奏憲排陷大臣放肆爲奸 上命羣臣
按治之憲伏誅十一月壬辰大將軍達等平虜師還明日善長
率百官上表賀丙申大封功臣乃授開國輔運推誠守正文臣
特進光祿大夫左柱國太師中書左丞相封韓國公叅軍國事
食祿四千石賜 誥命鐵券仍賜文綺及帛一百疋時封公者
六人善長其首也是冬禮部尚書陶凱請專選東宮官罷善長

等兼職庶於輔導有所責成。上曰古者官不必備惟其賢朕以廷臣有才望勲德者兼東宮官非無謂也嘗慮廷臣與宮僚有不相合遂成嫌隙或生奸謀離間骨肉其禍非細若江充之事可謂明鑑朕今立此兼職父子一體君臣一心庶無相構之患也。上與陶凱論齋戒當致誠因諭善長等曰人之一心極難檢點心爲身之主若一事不合理則百事皆廢所以常自檢心凡事必求至當今每遇齋戒必思齊整心志對越神明善長頓首曰陛下此言乃聖賢治心之道心旣治天下無難治矣。四年正月善長乞致仕許之賜臨濠地若干頃守墳人百五十戶佃戶一千五百戶餘詳中書省。

唐鐸字振之直隸鳳陽府虹縣人自幼有遠略初守濠州庚子

從上討江州授西安縣丞召還除中書管勾出知延平府洪

武三年召爲殿中侍御史四年正月己亥御史臺進憲綱四十

條上覽之謂鐸等曰元時任官但貴本族輕中國之士南人

至不得入風憲豈皆公道朕之用人惟才是使無問南北風憲

作朕耳目任得其人自無壅蔽之患鐸對曰臣聞元朝遣使宣

撫初出之時四方驚動及其至也畧無能爲民爲之語曰遣使

宣撫問民疾苦來若迅雷去若敗鼓至今羞之陛下視同

仁任官惟賢尤重風憲明立法度所以安百姓興太平也未幾

復出知紹興府七年陞刑部尚書本年改太常寺卿內艱家居

賜食半俸十三年服闋轉兵部尚書十五年遷諫議大夫十七年四月己丑上謂鐸曰人有公私好惡不同故其言有邪有正正言務規諫邪言務阿諂謗言近於忠諛言近於愛惟不惑於謗言則聽日聰而讒人自去不眩於諛言則智益明而佞自絕矣鐸對曰聽言之難自古爲然惟不爲所眩惑則讒佞自遠

上曰朕日總萬幾所行有得失非資人言何由以知故廣開言路以來衆言言有善者則獎而行之言之非實亦不之罪惟讒諂面諛者決不可容也尋以事左遷監察御史十八年陟右副都御史十九年復陞刑部尚書十月焚錦衣衛刑具先是天下官民有犯者俱命屬法司其有重罪逮至京者或令收繫錦衣衛

審情辭用事者因而非禮凌虐上聞之怒曰訊鞫者法司事也凡負重罪來者或令錦衣衛審之欲先得其情耳豈令其煅煉耶而乃非法如是命取其刑具悉焚之以所繫囚送刑部審理時諸卿中詹徽以才勝鐸以德勝然不動聲色而政務修理人咸愛之上嘗曰都御史徽掌刑部事鐸二人性行不同下人事之亦異徽剛斷嫉惡不容奸僞役吏髮蓬面垢容愁肌瘠不異羈囚亦不得肆其貪故若是鐸始友及臣至今三十四載交不知變色口不出惡聲德有餘而才稍不足屢被小人誣誤陷刑者數矣朕深知其德曲宥弗罪奸人忌徽剛則謗訕滿朝鐸重厚無疵又謂懦而無爲一切文移計稟皆舞文弄法愚鐸

賄賂公行鐸無奈何嗚呼聰明決斷者以爲非淵德海涵者以爲愚人之不古有此邪二十一年奉 旨凡中外臣民犯罪有大誥俱減一等科論本年復改兵部尚書 太祖諭鐸曰各衛所軍有逃故者令本管編成圖冊送兵部照名行取不許多差人各府勾擾州縣類造軍戶文冊遇有勾丁按籍起解其民匠充軍者月支米八斗牧馬軍士支一石及後復令民丁邊軍操練者月支米一石二十二年四月丙寅置詹事院秩正三品上謂吏部侍郎侯庸曰朕觀歷代賢明之君於輔導太子必擇忠正賢良之士三代保傅禮甚尊嚴後世若唐太宗爲子擇師傅而李綱之徒直言正議頗有裨益今東宮官屬詹事未設衆務

無所統領兵部尚書唐鐸爲人謹厚有德量宜當是任其以鐸
爲詹事仍兼尚書之祿本年致仕二十五年起詹事二十六年
兼太子賓客二十七年加太子少保四月癸未 上謂鐸曰帝
王之於天下體天道順人心以爲治則國家基業自然久安朕
思前代亂亡之故未有不由於違天道逆人心所致也天之愛
民故立之君以治之君能安安生民則可以保天眷卿與共事
者久夙夜左右資弼良多朕之事天子民有弗至者卿卽以爲
言使知所警毋謂已安不以爲意治亂繫焉鐸頓首曰 陛下
敬天恤民之心惓惓如此臣雖老悖敢不奉命二十八年使龍
州諭趙宗壽還復出叅議總兵楊文軍事經畫守衛撫綏蠻獠

事竣還京三十年卒於京年六十九鐸重厚縝密不妄取予

太祖起兵卽在左右每以故舊遇之雖僚屬罪數連鐸上念鐸

篤行皆不聞故始終保全云

蹇義字宜之四川巴縣人洪武乙丑進士授中書舍人累官吏
部尚書永樂二年冊仁宗爲皇太子命義兼詹事時師傅皆
勲臣兼之而輔導責任文臣詹事蓋元僚也上欲有諭皇

太子率諭詹事往導意義亦委曲周悉皇太子尤愛重義所

言靡不信用滿三載陞資政大夫七年車駕巡狩北京命

輔皇太子監國中外庶務惟諸王及遠夷有奏請詣行在

餘悉啓聞處分義熟於典故又達於政體孜孜無倦不動聲色

而事賴以濟 賜詔以其官秩封贈三代滿九載 賜勅有秉
心正直及淳良篤實裨益 國家之褒數奉命兼禮部事雖職
務填委處之裕如十七年丁父喪歸有 詔起復詣北京謝
上慰勞再三賜鈔千緡遣中官護送歸南京十八年詔定鼎北京
從 皇太子朝北京遂命巡撫直隸應天等府州問兵民休戚
及文武吏之賢否而陞黜之義謂 國家多事之際悉以法繩
吏人將不勝特黜其太甚者數人餘多見寬假而兵民利弊當
興革者具奏行之二十二年 仁宗嗣位進少保詳吏部
金忠字世忠浙江鄞縣人洪武末年靖難師起以儒士入見命
署紀善遂從征伐歷陞工部侍郎永樂二年累官兵部尚書

命兼領詹事府詹事忠事 上敬慎小心每被顧問知無不言退

未嘗泄以是益見禮遇而委任益篤焉輔導儲君以正直自持
言無不盡尤見優待遇同列論事徑情直發不肯持兩端依阿
更虛已服善兵部機務繁劇嘗推讓同官之賢能其或一事失
當則必自引咎人有片善必稱之雖有素與忠異意者其人有
他善未嘗不稱也尤好獎掖善類士有得一官而往見者必戒
之曰國家待士厚所望爲民造福耳所至一以濟物爲務聞人
出片言語涉暴刻輒艱然色變博於史學每論當時成敗治亂
之故娓娓千數百言不竭其源委折曲如身親覩之者十三年
卒於官年六十三訃聞 上爲文祭之有曰殫竭心膂克勤夙

夜小心慎密始終無間 皇太子爲文祭之有曰能盡乃心知
無不言助益多矣又曰老成忠厚方資之爲輔而遽沒焉觀忠
君臣之際始終一德生榮死哀亦可爲奇遇云贈少師謚忠襄
詳國初兵部

國朝列卿紀卷之十五

詹事府詹事年表

吳中

山東武城人監生永樂二十二年以刑部尚書兼任踰月改工部累加少師卒封荏平伯諡榮襄

向寶

江西進賢人進士永樂二十二年以右都兼任洪熙元年調南院

黃福

山東昌邑人鄉舉永樂二十二年以工部尚書兼任宣德元年撫交趾歷少保南京戶部尚書

俞士吉

浙江象山人鄉舉洪熙元年任宣德元年改刑部右侍郎

郭璉

直隸新安人國子生宣德元年以吏部侍郎掌府事四年陞吏部尚書

胡濙

直隸武進人進士宣德四年以禮部尚書致仕六年兼署戶部事累加少傅卒贈太保諡忠安

習嘉言

江西新喻人進士正統十四年任兼翰林院學士景泰二年卒

儀銘

山東高密人官生景泰三年以兵部尚書兼任加太子太保六年卒贈太師諡忠襄

陳文

江西廬陵人進士天順元年任兼學士七年入閣歷太子少保文淵閣大學士卒諡莊靖

李泰

順天香河人進士成化三年任兼侍讀學士五年卒贈禮部左侍郎

彭華

江西安福人進士成化十五年任兼學士二十一年入閣歷太子少保兼禮部尚書卒諡文思

丘濬

廣東瓊山人進士成化二十二年以禮部尚書兼學士掌府事弘治四年入閣歷少保武英殿大學士諡文莊

費閻

直隸丹徒人進士弘治三年任兼侍讀學士本年陞禮部右侍郎

汪諧

浙江仁和人進士弘治四年以禮部右侍郎兼學士掌府事五年致仕卒贈禮部尚書

陸簡

直隸武進人進士弘治七年任兼侍讀學士八年卒贈禮部右侍郎

謝遷

浙江餘姚人進士弘治八年以內閣領詹事兼侍讀學士十一年進宮保歷少傅諱身殿大學士諡文正

程敏政

直隸休寧人進士弘治十一年任兼學士加禮部右侍郎仍前任十二年致仕贈禮部尚書

傅瀚

江西新喻人進士弘治十二年以禮部侍郎兼學士掌府事十三年陞禮部尚書卒贈太子太保諡文穆

吳寬

直隸長洲人進士弘治十三年以吏侍兼學士掌府事加禮部尚書十七年卒贈太子太保諡文定

張元禎

江西南昌人進士弘治十七年以太常卿兼學士掌府事加吏部左侍郎仍前任正德元年卒

楊廷和

四川新都人進士正德元年任兼學士本年陞南吏侍歷內閣少師華蓋殿大學士諡文襄

劉機

順天大興人進士正德二年以禮部侍郎兼學士掌府事本年陞禮書歷吏部南兵尚書

梁儲

廣東順德人進士正德二年以吏部尚書兼學士掌府事四年降吏侍歷內閣少師華蓋殿大學士卒諡文康

劉忠

河南陳留人進士正德五年以吏部尚書兼學士掌府事本年入閣歷少傅武英殿大學士卒諡文肅

白鉞

直隸南宮人進士正德五年以禮部尚書兼學士掌府事加太子少保本年卒贈太子太保諡文裕

靳貴

直隸丹徒人進士正德五年以吏部侍郎兼學士掌府事九年入閣歷太子太保武英殿大學士卒諡文僖

蔣冕

廣西全州人進士正德九年以吏部侍郎兼學士掌府事十一年入閣歷少傅謹身殿大學士

毛紀

山東掖縣人進士正德十一年以禮部尚書兼學士掌府事十二年入閣歷少保謹身殿大學士

李遜學

河南上蔡人進士正德十二年以禮部尚書兼學士掌府事本年卒贈太子太保謚文簡

劉春

四川巴縣人進士正德十六年以禮部尚書兼學士掌府事本年卒贈太子太保謚文簡

石瑤

直隸藁城人進士正德十六年以禮部尚書兼學士掌府事嘉靖三年入閣歷少保

賈誅

河南臨潁人進士嘉靖三年以吏部侍郎兼學士掌府事四年入閣歷少保武英殿大學士

吳一鵬

直隸長洲人進士嘉靖三年以禮部左侍郎兼翰林學士掌府事四年加禮部尚書六年改禮部

董玘

浙江會稽人進士嘉靖四年任兼學士六年陞吏部右侍郎

張孚敬

浙江永嘉人進士嘉靖四年任兼學士五年入閣歷少師華蓋殿大學士卒謚文忠

桂萼

江西安仁人進士嘉靖四年任兼學士六年遷禮部侍郎歷內閣少傅武英殿大學士

徐縉

直隸吳縣人進士嘉靖六年任兼學士本年陞禮部侍郎歷吏部右侍郎

溫仁和

四川華陽人進士嘉靖六年以吏部侍郎兼學士掌府事本年下憂

霍

韜

廣東南海人進士嘉靖六年任兼學士九年丁憂

黃

綰

浙江黃岩人官生嘉靖七年任兼學士本年陞南禮部侍郎歷禮部尚書

顧鼎臣

直隸崑山人進士嘉靖七年任兼學士加至禮部尚書太子太保十七年入閣歷少保武英殿大學士

溫仁和

詳前嘉靖十七年以工部尚書改禮書兼學士掌府事加太子少保二十年致仕卒諡文恪

霍一韜

詳前嘉靖十八年以禮部尚書兼學士協掌府事加太子少保二十年卒諡文敏

陸深

直隸上海人進士嘉靖十八年任兼學士二十年致仕

張邦奇

浙江鄞縣人進士嘉靖二十年以吏部左侍郎兼學士掌府事本年回理禮部事改南兵部尚書卒諡文定

張潮

四川內江人進士嘉靖二十一年以禮部尚書兼學士掌府事二十三年卒

費家

江西鉛山人進士嘉靖二十三年以禮部尚書兼學士掌府事本年回理禮部事加少保卒諡文通

孫承恩

直隸華亭人進士嘉靖二十三年以吏部侍郎兼學士掌府事二十九年改理禮部事

歐陽德

江西太和人進士嘉靖二十九年以吏部侍郎兼學士掌府事本年丁憂

孫承恩

詳前嘉靖二十九年致仕

程文德

浙江永康人榜眼嘉靖三十二年以吏部左侍郎兼翰林院學士掌府事三十四年為民

閔如霖

浙江烏程人進士嘉靖三十四年以吏部左侍郎掌府事本年陞南京禮部尚書

李璣

江西豐城人進士嘉靖三十四年以吏部右侍郎兼翰林院學士掌府事三十九年陞南京禮部尚書

郭朴

河南安陽人進士

董份

浙江烏程人進士

高拱

河南新鄭人進士

詹事府詹事行實

吳中字司正山東東昌府武城縣人洪武戊寅由國子生授營州後屯衛經歷累官刑部尚書永樂二十二年仁宗嗣位命兼詹事踰月改工部仍兼詹事本年進太子少保加至少師卒贈荏平伯謚榮襄詳工部

向寶字克忠江西南昌府進賢縣人洪武乙丑進士授庫部試員外郎累官通政使奏改應天府尹謫廣西蒼梧甲申復前職庚寅降兩淮通判未幾訟繫南京乙未宥復職命督運糧餉併總督漕運材木甲辰八月仁宗卽位驛召還以爲都察院左僉都御史翌日入謝陞右都御史階資善大夫未幾復命

兼詹事府詹事特賜楮幣羊酒寶鑑雖屢見挫抑而志於有
爲到官不數日卽條陳八事以進其一曰錄用勲舊二曰設置
諫官三曰選舉賢材四曰簡練將帥五曰責重有司六曰考覈
吏員七曰監生資格八曰疏通鈔法其言皆懇切有裨時政
上命次第行之宣宗卽位之初以南京都察院缺人特命往蒞
焉餘詳南京都察院

黃福字如錫山東萊州府昌邑縣人洪武甲子鄉貢授項城主
簿累陞金吾衛知事戊寅陞龍江衛經歷是歲上章論國家大
計超陞工部右侍郎壬午調左未幾陞工部尚書掌文趾布按
二司事永樂二十二年仁宗卽位驛召還京父老不忍舍去

泣送於塗者千萬人至遮道不能行及抵京仍爲工部尚書兼
詹事府詹事賜以白金綵幣 賜誥命褒崇推恩及其祖考洪
熙乙巳扈從 東宮至南及回 上賓天 宣宗嗣登寶位命
董 獻陵事賜資優渥旣竣事以久違先壟奏乞歸省 上允
之賜以路費馳驛而回未逾月復召還京嬰疾 上遣醫調護
命中使賜以珍饌疾愈持節 寧府行冊封禮適交趾警報及
掌三司事兵部尚書陳洽累疏乞福復鎮遂驛召還京 上命
仍領布按三司事累官少保南京戶部尚書詳南京戶部
俞士吉字用貞浙江寧波府象山縣人洪武丙子鄉舉授兗州
府學訓導革除中拜南院監察御史壬午年 文廟入正大統

改廣西道監察御史尋陞都察院右僉都御史末樂四年坐事
謫爲辦事官尋復原職 命賑卹兩浙饑荒五年回京降襄陽
知府十五年陞山東左叅政洪熙元年召爲詹事府詹事未幾
宣宗嗣位改刑部右侍郎詳南京刑部

郭璉字時用直隸新安人國子生末樂初年爲戶部主事以勤
敏爲 文廟所知歷陞福建叅議山東叅政俱有政績五年進
工部侍郎督湖廣武當山宮觀十九年命安撫江西考察官吏
二十二年改吏部 仁廟嗣位命兼少詹事 宣宗登極命掌
詹事府四年進吏部尚書詳吏部

胡濙字源潔直隸常州府武進縣人革除庚辰進士授兵科給

事中遷右給事永樂元年以奏對稱旨陞戶科都給事中丁亥以訪異人爲名命巡遊天下還朝陞禮部左侍郎仁宗嗣位聞曾有密疏疑之轉太子賓客兼國子祭酒之官南京宣德元年召留行在禮部進尚書四年己酉命兼詹事府事夏五月扈從北巡時常民有豪橫者既抵於法悉以田宅賜之五年庚戌宣宗一日召浚曰侍郎如某者吾所任戶部輒欲差巡撫汝與楊士奇等議巡撫須用不須用退偕士奇等覆奏比年糧餉多稽差部屬官動數員民擾事誤須得重臣則民安而事集上曰爾等試舉堪任侍郎者以名聞因疏薦某等若干人上喜皆陞侍郎俾巡撫當時吏部復言浚等侵越殊不知上惟

命與楊士奇等議固不敢援吏部也辛亥命兼行在戶部事八年命同楊士奇等遊西苑倚任益隆每宴見上虛心問曰卿有何言得其奏章卽施行之時有芝產於公署人以和氣所召英宗踐祚惟圖任舊人待之尤厚凡軍國重務皆與聞加授資德大夫正治上卿每考績必有賚予甲子乞致仕上以其精力未衰慰勉留之已巳上親征北虜命留守京師會車駕北狩廊王嗣位進太子太傅詳禮部

習嘉言名

以字行江西臨江府新喻縣人末樂戊戌進士改

庶吉士時留翰林者惟嘉言與吉水周敘尹鳳岐高郵董璘上海楊珙華亭陳詢六人授編修餘皆授諸司官有差宣德間轉

修撰正統初與修 宣宗實錄三年書成陞侍讀五年陞南太常寺少卿七年改太常十四年陞詹事府詹事兼翰林院學士爲人沈毅莊靖爲 上所眷重嘗進封六事皆切時政每有章疏悉嘉納之景泰二年卒所著有尋樂集

儀銘字

山東萊州府高密縣人以恩廕入太學擢兵科給

事中改編修正統三年陞本院侍講侍 邸王講讀五年陞

邸府長史景泰卽位以潛邸恩陞禮部右侍郎未幾陞南京禮部尚書三年召改兵部尚書兼詹事府詹事及廣西奸人黃竑議易儲立見濟易 憲宗爲沂王加太子太保卒贈太師謚忠襄詳兵部

陳文字安簡江西吉安府廬陵縣人正統丙辰進士第二名授
編修丁卯年英宗簡翰林之臣十人俾進學閣中文與其列
一日修撰商輅侍班上諭學士曹鼎曰商輅著展書宜選一
人爲對再選得文乃允尋命侍經筵陞侍講少保高穀薦陞雲
南右布政凡益官便民之事靡不興舉丙子冬入覲至京師
以卓異旌丁丑春還會英廟復位紀元天順間問文何在近
臣以實對遂陞廣東左布政使以丁內艱不果赴戊寅驛召至
京特拜詹事府詹事兼學士仍食從二品祿懇請終制弗允乃
就職每朝罷入侍東宮講筵退與諸儒臣議所以勸講之方
啟沃良多癸未春陞禮部右侍郎兼翰林院學士入閣叅預機

務詳內閣

李泰字文通順天府香河縣人正統戊辰進士選庶吉士授編修景泰間遷左春坊司直郎兼編修再轉右中允英廟復辟改尚寶司丞兼編修既侍東宮講讀轉侍講成化改元陞侍講學士兼經筵官尋侍文華日講預修英廟實錄三年錄成陞少詹事兼侍講學士未幾進詹事兼職如故五年卒年四十三賜祭葬贈禮部侍郎太監李永昌泰之伯父也正統中掌章奏有寵泰爲其後初應鄉試京尹進錄英廟問左右李泰中否見其名甚喜及官翰林頗知向學矜已自足性狷僻與人寡合而所與者則相朋比汲引士類是以薄之

詞林記云予讀小說家見唐有皮思謙者冒中常侍魚朝恩之寵登高科歷顯仕未嘗身爲其後獲居宥密如李泰者也嗟乎翰林清要貴重匪宿儒不可以斯人踐斯地豈非子殿國師齊之辱乎

彭華字彥實江西安福縣人景泰甲戌進士第選庶吉士七年修寰宇通志成授編修天順元年奉使靖江王府還戊寅與

修大明一統志八年憲宗嗣位入侍經筵成化三年

英廟實錄成以纂修校正功遷侍讀四年戊子充講官五年進日講八年擢侍讀學士攝詹事府事賜金幣十三年修續資治通鑑綱目成遷翰林院學士孝廟出講儲宮華首講大學章

院事十五年用內閣萬安薦擢詹事仍兼學士十八年御製
文華大訓成進講儲宮加從二品祿二十二年陞吏部左侍郎
仍兼學士入閣預機務詳內閣

丘濬字仲深廣東瓊州府瓊山縣人景泰甲戌進士選庶吉士
七年授編修天順八年憲宗登極充經筵講官成化元年陞
侍講三年進侍講學士五年下母憂九年復職十三年陞翰林
院學士本年陞國子監祭酒十六年加禮部右侍郎仍掌監事
進大學衍義補上嘉悅賜白金二十兩紵絲二表裏陞禮部
尚書掌詹事府事且命錄其付刊行修憲廟實錄充副總
裁弘治四年實錄成加太子太保本年冬兼文淵閣大學士詳

內閣

費閻字廷言直隸鎮江府丹徒縣人成化己丑進士選庶吉士授編修成化丙申充經筵官丁酉遷國子司業丁未轉左諭德仍理司業事弘治元年陞祭酒 孝廟初開經筵充講官 車駕視學賜坐講彝倫褒諭宴資士林榮之二年直日講改少詹事兼侍讀修 憲廟實錄三年書成進詹事兼侍讀學士越月擢禮部侍郎卒詳禮部

汪諧字伯諧浙江杭州府仁和縣人以春秋舉順天京闈被革歸復舉浙江鄉試登天順庚辰進士簡入翰林爲庶吉士壬午授編修成化丙戌同考禮部會試丁亥 英廟實錄成以纂修

功遷修撰 賜宴及白金文綺襲衣丙申滿考擢右春坊右諭
德下西續宋元資治通鑑綱目成進右庶子戊戌侍 孝宗講
讀於東宮己亥以母艱去壬寅復任丙午典南畿鄉試丁未奉
詔授翰林諸吉士業是年 孝宗卽位以待從恩擢詹事府少
詹事兼翰林侍講學士掌院事弘治戊申諸奏將本院侍講等
官并內閣書寫誥勅等項署正等官會同內閣學士考察奉
旨吏部會同翰林掌印官考察尋開 經筵承 勅充講官庚戌
典禮部會試時方修 憲廟實錄爲副總裁辛亥疾作在告三
月上疏請停俸給不許每時節珍味卽賜於家書成勅陞禮部
右侍郎兼學士仍掌詹事府事階嘉議大夫 賜賚尤厚壬子

復上疏辭乃許之仍詔疾愈當復用自是獨處一室右臂猶持杯作書間爲文以應購者皆不失恒度越九年卒於京年六十八贈禮部尚書遼尚書徐公瓊諭祭仍給驛歸其喪命有司營葬事諸簡重寡言笑儀度整潔博弄音樂皆絕不好事母孝當家中衰力供甘旨竟貽祿養喪居枕塊得痺疾終其身與人恭遜嫺友有急輒加賙貸漢陽知府蔡洪濟客死時卹其孤博涉強記尤邃經學門下士經指授多取科第鑒閱精審每典試事輒稱得人所著古文歌詩醞藉有法有寅軒集若干卷藏於家慮事周悉晚益慎密雖居官久不涉世務優游鉛槧間爲疾疢所困而卒論者多深惜之

陸簡字廉伯直隸常州府武進縣人先贅金氏祖任奉化訓導
徐宜人夢吞絳桃覺而生簡於奉化學舍生甫六七歲聰穎出
類爲奇對語意卓犖聞者知其不凡父爲戶部郎中與吏部尚
書莆田陳公俊同僚因遣從學居數月陳辭曰公子異才吾不
能爲若師也遣歸入郡庠爲諸生天才駿發若不可制復從耶
中公於京師遭徐宜人之喪扶櫬南歸自郡城及河七十里徒
跣號泣足破血流不自知觀者益奇其少年操行不可及成化
紀元服闋舉南畿鄉試第一明年上禮部大爲尚書姚文敏公
所鑒賞 廷試中一甲第三名 賜進士及第始奏復其姓授
翰林院編修與修 英宗實錄年才二十五是歲叔弟任刑部

主事卒於京邸憫其幼子弱女移疾乞恩護其喪歸葬家居二年不出其學益宏以粹及郎中公得謝養母促北上時 憲宗垂意稽古禮文之事 命館閣儒臣重勘朱子綱目時應制詩賦無虛月簡所進多稱旨未幾詔取宋元兩代史續綱目遴選史官十四人簡在選中總裁少保彭文憲公以元史付之元史修於 國初僅七月而成事多舛復簡芟繁撮要決疑闡隱爲力最多以九載考績陞侍講丁酉春續編成陞右春坊右諭德 孝宗在春宮講讀官八人簡與其一庚子應考順天府鄉試癸卯丁郎中公憂襄事已卽闔門謝客城南有地名龍臯治別墅讀書其中因號龍臯子而題其常所居曰治齋大事纂述

以箴譌補罅爲已任宋奎元兵寇城時刺史姚嵩等九人死其
難未秩祀典乃言有司立忠義祠以祀之又以蘇文忠公卒於
常亦欲立祠不果值 憲宗上賓修實錄至則 孝宗嗣位以
輔導舊臣陞右春坊右庶子兼翰林院侍讀充 經筵官又
命簡等四人日直便殿三年實錄成陞少詹事兼侍讀學士時
玉牒久未編纂復 命領之癸丑春主考禮部會試七年甲寅
上念侍從之勞特陞詹事府詹事兼翰林侍讀學士八年卒於官
贈禮部右侍郎年五十四簡天才超邁姿貌秀偉若不堪世故
其輔 儲極奉 經帷長史局必盡心力實錄垂成而十館所
修不能歸一簡等四人受委總勘彪分彙次始克成編主考兩

試得人爲多至於議禮論事必歸於至當有所不合正色昌言
人莫能奪與人交緩急周至尤樂汲引後進觴弈笑談終夕忘
倦爲詩文力追古作縝密峻潔一字不苟尤致力於諸經手自
校勘至疾革猶朱墨不離左右有文集數百卷但恃才不自檢
晚益矜誇自負當遠到旣久滯不顯多抑鬱齋志以沒論者謂
其氣蓋萬夫蓋志大而術疎云

謝遷字子喬浙江餘姚縣人成化乙未進士第一名授翰林院
修撰歷右春坊右諭德甲辰再同考禮部 孝宗毓德春宮慎
簡侍從首及遷乙巳充 經筵講官丁未 孝宗登極推恩宮
僚陞左春坊左庶子兼翰林院侍讀仍加俸一級初開 經筵

奉勅爲日講官與修憲廟實錄庚戌以省親請上嘉其孝聽給驛往且賜金帛爲道里費辛亥實錄成陞詹事府少詹事兼翰林院侍講學士加俸如前冬十月母鄒宜人卒其年簡菴公又卒訃聞蒙特恩賜葬祭乙卯春詔以本官入閣辦事時猶未終喪八月服闋赴京疏辭不允且陞詹事兼秩如舊蓋皇太子將出閣讀書欲重儲端之任故以輔臣領之丙辰命主會試所取多知名士是歲累有鶴袍犀帶之賜丁巳勅修大明會典爲總裁官戊午春皇太子出閣奉勅陞太子少保兵部尚書兼東閣大學士詳內閣

程敏政字克勤直隸徽州府休寧縣人徽之諸程皆出陳開府

儀同三司重安郡公靈洗至敏政曾祖杜壽坐累謫戍河間居
三世至父信始以河間學生舉進士官至南京兵部尚書兼大
興寺卿卒贈太子少保謚襄毅既貴復還休寧十餘歲隨襄毅
公叅政蜀藩巡撫侍郎羅綺以神童薦之朝英宗召試出題
命對曰鵬翮高飛搏扶搖之九萬敏政云龍墀獨對陳禮樂之
三千上首肯之且喜其拜起如老成人命賜食詔館閣試
之卽日賦聖節及瑞雪詩并經義各一篇援筆立就文采粲
然諸閣老翰長嗟異之暨進呈上喜甚詔讀書翰林院官給
廩饌時大學士南陽李賢安成彭時學士嘉興呂原中允壽光
劉珣皆當世碩儒皆就之講授李公尤愛之因妻以女踰冠舉

進士中成化丙戌科第一甲第二人授翰林院編修同修四庫
宗實錄已丑同考禮部貢舉時欲刊布 大明一統志洪武正
韻資治通鑑綱目皆同校勘正韻先後出有三本一爲承旨宋
濂序一爲待制吳沉序乃請以沉序者爲定本議者欲除去新
按汪氏綱目考異事已施行乃請大學士彭時以汪氏考異多
本於朱子不宜除盡請 上稱制臨決就於綱目之上隨修正
其舛誤彭公從之尋同修續資治通鑑綱目如宋石守信王審
琦不預陳橋之謀周韓通李筠李重進書死節開寶八年李煜
降始罷分注書正統張世傑死之下始書宋亡之類皆出其手
書成遷左春坊左諭德且以宋藝祖太宗授受大事也當時史

臣不能詳記遂乃啓千古之疑乃取宋李燾宋史長編元史臣
歐陽玄等宋史本紀以爲正而考訂發揮之餘黜陳涇胡一桂
之繆別著宋紀受終考三卷乙未春 廷試進士充父卷官俄
詔侍講經筵尋兼 皇太子讀講未幾丁襄毅公憂服闋入朝
丙午秋主考南京鄉試丁未 孝廟踐祚敘進宮臣遷詹事府
少詹事兼翰林院侍讀學士充日講官時 茂陵工將訖詔議
憲宗皇帝升祔當定祧遷之制 孝穆皇后神主當有奉寧之禮
太傅英國公張懋等上議以 德祖比周之后稷、太祖成祖
同周之文武俱百世不遷宜奉祧 懿祖一位別建祧廟奉藏
歲暮則奉迎 神主祫祭於 太祖之廟 孝穆皇后比周之

姜嫄及宋之章獻章懿二后皆別廟奉享宜於奉先殿旁近宮
室改別廟太保襄城侯李瑾等復上議以爲宜於奉先殿 憲
宗神主几筵之右別設幄殿以安 神主勅內官監於宮中相
度吉地候明年春營建別廟奏 上皆從之俱藁出其手弘治
戊申同修 憲宗實錄尋詔敏政率其屬侍 雍王講讀及
上將視學時禮儀簡略不稱 詔議儀注敏政倡議預齋一日加
帛一段樂設不作改分獻爲奠從之初開 經筵詔侍講仍日
侍文華殿講讀 上初卽位雅重講幄儒臣呼先生而不名嘗
因講罷 賜講官冠服敏政得金織緋袍一襲金帶冠履各一
慰勞甚至徽州府儒學訓導周成進治安備覽 詔看詳敏政

摘其中多竊宋趙善瑯自警編元張養浩牧民忠告或襲用其
標目或全剽其語言然此之猥不及彼之精况以治安爲名而
不及君德心學謂秦商鞅有見於孔門立信之說則又踵王安
石之故智其息異端等說亦非拔本塞源之論鄙俚而無雅馴
之言迂妄而非經久之策 詔以成狂妄置不問責還其書時
詔議從祀孔子廟庭諸賢上疏曰臣聞古聖王之治天下皆以祀
典爲重所以崇德報功而垂世教淑人心也故有功德於一時
者一時祀之更代則已有功德於一方者一方祀之踰境則已
然猶欲以勸一時範一方而不敢輕議焉况先師孔子有功德
於天下萬世則其廟庭脩食之人豈可苟焉而已必得文與行

兼名與實副有功於聖門無疵於公議者庶足以稱若非其人則豈唯先師之神不肯顧歆將使典模範者莫知所教爲弟子者莫知所學矣若戴勝身陷賊吏子爲賊徒劉向喜誦神仙方術謂黃金可成不驗下吏賈逵附會圖讖以致貴顯馬融爲梁冀草奏殺忠臣李固何休春秋解詁黜周王魯注風角等書班之孝經論語王弼與何晏倡爲清談取老莊之言以爲易注王肅女爲司馬昭妻佐昭篡魏杜預所注止左氏集傳其守襄陽則掎剋以饋遺洛中諸貴破吳則盡殺江陵譏已之人爲吏不廉爲將不義凡此諸人其於名教得罪不小而議者謂能抱遺經轉相傳授不爲無功臣竊以爲不然夫守遺經者若左丘明

公羊高穀梁赤之於春秋伏勝孔安國之於書毛萇之於詩高
堂生之於儀禮后蒼之於禮記杜子春之於周禮可以當之若
融等又不過訓詁此九人之所傳者爾夫所以祀之者非徒使
學者誦其詩讀其書亦將論其人而使之尚友也臣恐學者自
甘於效尤曰先賢亦若是爾其禍儒害道將有不可勝言者矣
請黜戴勝等八人褫爵罷祀而加后蒼封爵與左丘明一體從
祀及考孔門弟子見家語者顏回而下七十六人家語出於孔
氏當得其實而司馬遷史記多公伯寮秦冉顏何三人文翁成
都廟壁畫多遽瑗林放申枨三人邢昺論語注疏謂申枨在家
語作申續史記作申黨重複無稽一至於此况寮愬子路以沮

孔子而孔子嘗稱瑗爲夫子決非及門之士放雖嘗問禮諸家皆不載之子弟之列秦冉顏何疑於字畫譌誤臣請於振黨位號宜存其一寮瑗冉何放宜罷其祀請進隋王通宋胡瑗加以封爵列之從祀且顏回曾參孔伋孟軻以傳道配享坐於堂上而回之父無繇參之父皙伋之父鯉皆坐食廡下恐諸賢於冥冥之中未必安於心也宋大中大夫永年伯程珣嘗不附王安石新法而二子顥頤實接道統之傳獻靖公朱松嘗不附秦檜和議而其子熹實集道學之大成今宜以祀國公顏無繇萊蕪侯曾皙泗水侯孔鯉邾國公孟孫氏及程珣朱松配享啓聖王叔梁紇俾學者知道學之傳有開必先明倫之義不爲虛文矣

先是臺臣論奏請進賢退姦且各有所指敏政之名在所進中由是素忌者有逐之之意矣俄御史魏璋以曖昧之言中之

詔致仕有勸其自辯者敏政答書謂歐陽公朱文公當時各遭讒謗時歐公在執政故力可辯文公在庶寮故不可辯恐反遭鍛鍊故耳況上有老母下有弱子邪既歸讀書休寧南山中若將終其身焉郎中陸容給事中楊廉進士夏某錦衣千戶葉通先後上書訟其冤上悟召還將赴召有以書止之者敏政答書以爲自古聖賢固不以不仕爲高亦不以苟就爲得雖伊川之嚴重剛毅至於復官之際無所辭焉誠以義之所在擇之宜精而非顧一己之私者也可辭則辭可無辭則無辭一出於誠心

直道是乃聖賢爲已之學豈以流俗之譏爲之前却也若
遠臣不得不辭晦叔世臣不得不起豈非當時亦有輕重於兩
公者而伊川以義斷之若此乎至於文公被召必遜南軒被召
必行者亦皆遠臣與世臣之義不同也僕雖不敢上擬申公南
軒然世受國恩無不同者僕之心事自知甚明向以妄庸大
與世忤果若人言則雖投竄不足以塞責荷主上大恩但俾
歸田里今一旦復其舊官雪其幽枉若稍偃蹇則疑若出於忿
懟不平之餘恐於大義有所不可入謝之後或驅策之難前或
職業之難稱則如伊川所謂受一月之俸然後隨吾所欲者是
誠在我豈敢厯公議而自取再辱哉惟明者亮之旣至職任如

故命教庶吉士於翰林院尋遷太常寺卿仍兼翰林院侍讀學士掌院事兼修玉牒時有上書請以宋儒楊時從祀孔廟者詔下廷臣僉議上疏曰臣竊考程氏遺書朱子伊洛淵源稱其造養深遠踐履純固然無疾言遽色及其學成而歸程子目送之曰吾道南矣一傳而得豫章羅氏再傳而得延平李氏以授朱子號爲正宗文定胡氏親承指授而春秋之傳作南軒上沂淵源而太極之義闡心學所漸悉本伊洛使天下之士曉然知虛寂之非道訓詁之非學詞章之非義則龜山傳道之功不可誣矣當崇寧之世京輔柄國躋王安石於配享位次孟子而頌其新經以取士尊程氏爲聖人不復知有孔子誦新經爲

聖言不復知有言訓僭聖叛經凡數十年龜山入朝首請黜其
配享廢其新經又請罷綱運以收人心斥和議以張國勢竄權
臣以正邪寇培王德以崇治本則其衛道之功亦不可掩朱子
謂龜山之出惟胡安定之言最公當時若能聽用決湏救得一
半然請講於龜山若文定私淑於龜山若朱張咸在侑食之例
獨其師有傳道衛聖之功反不預焉揆之人心誠爲闕典今以
龜山躋於從祀列東廡司馬光之下胡安國之上宜矣其應封
伯爵行移翰林院定擬仍行國子監及天下學校一體從祀從
之尋丁內艱杖護歸鄉與襄毅公合葬會 詔修大明會典

召爲副總裁疏乞終制許之十一年服闋入朝未至轉詹事府詹

事兼翰林院學士 陛見後遷禮部右侍郎兼學士會典副總裁仍掌詹事府事侍 東宮講讀已未春主考會試未揭榜給事中華鼎劾其有鬻題賣士下 詔獄敏政疏請致仕且引咎自責乞釋鼎以全諫臣旣而獄上亦以諫官一時風聞無迹可指而同列林廷玉再疏劾之敏政曰有識者皆知鼎爲妄吾所以不深辨者顧存大體爾今言不置是豈欲但已也乃請與廷辯廷玉果語塞坐罪敏政致仕未行卒年五十五贈禮部尚書敏政秀眉長顙風神清茂於書無所不讀文章爲一代宗臣天稟既高而又上泝伊洛淵源深探而精擇嘗考合朱陸二家始之所以異而終之所以同爲道一編其造詣槩可見矣侍 經

筵久每進講篇終必有規諫諷切深至 上每欣然聽納喜接
士大夫不以貴自偁不以才自負升其堂者屢談不厭叩之者
不能測其涯涘雖遭多言至於逮繫言動如平日未嘗有幾微
不平意新安之篁墩以多竹故名且開府舊賜第廟食處也唐
廣明中巢賊嘗經其第與已姓同者則不動民懼其戕害乃遷
就之改篁爲黃公成化間省襄毅公歸考於圖牒詢於父老惡
其以忠臣故第爲逆巢所污乃復爲篁墩因以自號故所著有
篁墩稿續稿三稿新稿共百二十卷行素一卷編類 皇明文
衡一百卷蘇氏檇杙若干卷道一編六卷瀛賢奏對錄若干卷
新安文獻志一百卷宋逸民錄十五卷修定程氏統宗譜四十

卷陪郭支補三卷程氏貽範集四十卷附注真文忠公心經三
卷大學有重定本子燠以襄毅公功官錦衣衛千戶贊曰君子
修身以俟命身修矣而禍患毀辱之來有不可禦者豈非命歟
若張欽夫之不壽呂伯恭之痼疾蔡季通之竄死朱元晦之追
奪豈其自取之邪况失鉄妄意於鄰叟盜金見誣於同舍自昔
然矣噫克勤而罹此悲夫

傅瀚字曰川江西臨江府新喻縣人天順甲申進士改庶吉士
授檢討進修撰成化間孝宗出閣命兼司經局校書左諭德
兼檢討充經筵講官及東宮講讀官時方士李孜省爲道
政使得侍經筵瀚進講極言汰冗官李銜之不爲動

位以舊學恩進太常少卿兼侍讀仍充經筵講官兼日講每進講誠意懇切敷陳詳婉而進止雍容上每注聽焉三年

憲廟實錄成進累官太常卿兼侍講學士弘治六年遷禮部右侍郎九年南京吏部缺尚書僉舉尚書倪岳瀚言倪之才何可寘之南或謂倪往公不當次進乎瀚曰吾知爲國遑恤其他及金谿徐公瓊進尚書瀚轉左侍郎徐凡事多倚成之司屬按呈必自問曰傅先生以爲何如初祠部給度十年一舉時僧道入京師以萬計權貴多爲之請瀚力言此輩蠹耗天下宜痛加禁革縱未能如祖宗朝之制亦當稍賜裁抑遂改十年給度之例時以龜山楊時從祀孔子廟庭言者因謂羅從愿李侗亦當從

祀瀚言王子著述視尹燁游酢謝良佐未知所先後王子從祀則三人似不可遺道學所在其可濫乎乃止已未知貢舉俄因廷薦以本官兼翰林學士掌詹事府事仍兼日講官會典副總裁庚申進禮部尚書詳禮部